

Nums locals da Cungieri, Val Bugnei ed anora ed engiu

Ella Tuatschina nr. 9/1991 hai jeu publicau nums locals "sunter il **Strem** cun **Maises** e **Valtgeva**". Quels nums enonuschev'jeu per gronda part mez. Il bien resun ha intimau mei da silmeins aunc nudar si pil mument quels da **Cungieri**, **Val Bugnei** e **Nislas** entochen en sut **Sedrun**. Cheu suondan ils resultats rimnai cun grond sustegn d'Ignazi Monn, che ha accumpignau mei sco bien cumpogn e versau enonuschider da quei territori entras sia experienza da pastur, d'um da cuolm (fein a pastg) e secapescha da catschadur.

Per il territori da **Cungieri** havein nus entschiet cun la **Pastira del Run** che setila sur la viafier, naven dil camp da giuvenils e la staziun dalla sutgera, entochen enasi tier la **Giassa** che meina viasi el mises da **Valtgeva**. Orgiudem dado la pastira dil **Run** ei **Pitgmun**: In toc prau che cunfinescha anora cun la **Spinatscha**: pastira ed ensi encunter **Las Badugnias**: in terren plein plontas da badugn. Siaden en quei areal setila la **Val dels Bischels**.

Sur la pastira dil **Run** si s'extenda gl'areal che secloma **Sedrun Sura**. Denter **Sedrun Sura** e la pastira dil **Run** secatta il **Crest Caschleglia** (pastira). Dretg dil **Crest Caschleglia** enasi setila la **Val de Sedrun Sura**. Dado quella sesanfla il **Crest de Schibas** ed aunc ina ga pli anora **Crest l'Acla** (prau). Cheu giusut ed anora entscheiva la plontaziun **Niregl** che tonscha entochen o en la **Val Bugnei**.

Sur **Crest l'Acla** sin l'entira ladezia **Praus Cungieri**, **Maises Cungieri**, **Pastira de Cungieri**. Anen encunter il **Run** sei **Ruina Plauna**. Era da quella vart si encunter il restaurant sei oz in pulit uaul. Ils vegls schevan a quella sort da fein a pastg **Pala Pintga** ed endadens sei **Crappa Grossa**. Enasisu la greppa ei lu **Pala Gronda**. Naven dil restaurant va il **Fil ded Alp** si encunter **Cuelm de Vi** entochen si tier la tegia da cauras (**Cuelm de Vi**) **Stavlets**.

Il dies naven dil restaurant oragiu denter la pastira da **Cungieri** e **Val Bugnei** senumna **Crest ded Alp**.

Ils nums suandonts pertuccan aschia la **Val Bugnei**.

Dado la staziun dalla sutgera da **Cungieri** entscheiva igl **Uaut dellas Foppettas** e giusut las **Foppettas** (pastira). Il territori ensi secloma **Sur gl'Uaut**. E mond da cheu ora viers il **Bostg** vegn ins gl'emprem tier la renomada **Plaunca de Roz** (duas plauncas diraglia e tessaglia), lu **Pala Platta Biala**. Lu vegn il **Run de Bugnei** e gest sunter il **Plaun la Draussa**, ils **Bruis** e suro il **Plaun Nurset** e la **Gionda de Cuelm de Vi** cun **Péz las Palas** lu las plauncas cul num **Las Palas**, lu suonda gia il **Crest la Metga** e la **Pala del Fravi** ed odem la **Val Garviuts** epi essan schon sil **Fil del Bostg** cun las **Palas Udatsch** ed **Uaul Udatsch**.

Da miez ora naven dil **Crest ded Alp** ein ils **Fistatgs** (uaul) ed ins arriva prest a **Siat Fontaunas** (priu e pastira) e lu a **Plaun Platta Biala** (sut **Plaunca da Roz**) e lu **Uaut Platta Biala** e **Val Liunga**. **Val Dadains** ei mises cun prau e pastira, pli engiu **Prau Sut**. **Val Dadora**, mises cun prau e pastira.

Lu va ei schon dalla **Val Bugnei** giu **Gravas** che tonschan tochen giu tier la VMG. Giu amiez la val ei il **Reservuar** ed ins arriva vi en igl **Uaut Stgir** e gest sisu vegn igl **Uaut Niregl** cun **Val Custeri**, **Val Ruinatsch** e **Scanziala**. Sut igl **Uaul Niregl** ein **Las Plauncas** ed ora encunter la **Val Bugnei O Davus**.

Ils suandonts nums pertuccan igl **Uaut Bugnei**.

Sisum havein nus cheu **Bostg Dadains** e **Bostg Dadora**, lu igl **Uaut Bugnei** per propi cun ils **Fistatgs della Tscheppa** e **dell'Arshella**. Lu gest sur **Bugnei** la **Plontaziun** e quei prau pli anora sur la VMG ei **La Tscheppa**.

Dado il vitg da **Bugnei** e sur la via cantunala ei il **Prau de Bugnei** lu **Uaut Beglel Sura** e **L'Arshella**.

Lein nus aunc prender il territori sut la via cantunala entochen giu tier il **Rain** naven dils cunfins da **Mustér** anen, sche sei d'entscheiver cun **Nislas** cun ils nums **Ardem**, **L'Acla**, **Prau Nislas**, **Val de Nislas** e **L'Arshella**. Pli anen giu sper l'aua ei gia **Gravas**, sisu ei **Beglel Sut** e pli ensi **Beglel Sura**. Giudem ei lu **Mulinets** cun las **Plauncas Mulinets** e sisu ils **Plauns de Bugnei**, lu puspei giudem **Plauns Venzin**, **Runs** e **Plauncas de Runs**, lu essan en giudem la **Val Bugnei**. Da la vart

da **Sedrun** dat ei il num **Viels**, lu essan els **Plauns Sedrun, Prau de Vitg** cun las **Vals Dado** e **Vals Dadains** e lu vegn gia il **Run** che divida **Gonda** e **Sedrun**.

Toni Berther